



Grupo Provincial Socialista

Rúa Progreso, 32 – 2º andar
32003 Ourense
Tlf. 988 385 203 Tlf/Fax. 988 385 178
CIF: G32244345

RAFAEL RODRÍGUEZ VILLARINO, deputado e voceiro do Grupo Provincial Socialista da Deputación de Ourense, en base ó previsto na Lei de Bases Reguladora do Réxime Local, ó artigo 91 e 97, entre outros, do R.O.F. e o Regulamento da Corporación presenta unha **MOCIÓN SOBRE O REPARTO XUSTO, EQUITATIVO E DEMOCRÁTICO DOS FONDOS PÚBLICOS DA DEPUTACIÓN DE OURENSE ENTRE TODOS OS MUNICIPIOS DA PROVINCIA**

As deputacións son institucións que teñen entre os seus obxectivos, traballar activamente polo benestar da provincia, garantindo os principios de solidariedade e equilibrio intermunicipais en todo o seu territorio, así como a prestación integral e adecuada, tamén en todo o seu territorio, de servizos nas entidades locais. Por tanto, é fundamental que o seu orzamento sexa distribuído de forma xusta e equitativa entre todos os municipios e habitantes. Mais isto non está a suceder en Ourense.

A distribución destes fondos públicos debería basearse en criterios obxectivos, equitativos, operativos e democráticos, en función das necesidades reais de cada localidade. Nunca debe ser utilizada como un instrumento político para recompensar a aqueles que se máis se arriman ás políticas e aos intereses do partido no poder provincial.

A recorrente concesión de subvencións nominativas –asignación de cartos a dedo– pode fomentar irregularidades administrativas e actuacións discriminatorias, xa que os concellos poden sentirse obrigados a tomar decisións partidistas para lograr estes fondos, en lugar de adoptar decisións en función do que é mellor para os seus cidadáns e o seu territorio. E isto, sen dúbida, pode provocar unha mala xestión dos fondos públicos e un uso ineficiente dos recursos dispoñibles.

Un reparto en base a intereses políticos pode acentuar e perpetuar a desigualdade e o subdesenvolvemento dalgunhas localidades, mentres que outras poden recibir unha cantidade excesiva de recursos. Isto vai en contra dos principios de equidade, solidariedade e xustiza e pode ter un impacto negativo no benestar de todos os veciños e veciñas, así como no desenvolvemento provincial global.

Isto é xustamente o que está a suceder nesta Deputación de Ourense, onde a meirande parte dos fondos públicos dispoñibles son usados partidistamente, en beneficio político e persoal do presidente da institución, do seu partido e dos seus achegados ou achegadas.

A discrecionalidade na toma de decisións que articulan as grandes modificacións orzamentarias que esta deputación aproba, é clamorosa: nin son xustas nin son imparciais. Tampouco son transparentes, xa que son decididas dixitalmente sen convocatoria pública. Non se basean nunha avaliación xusta e equitativa das necesidades –algo que afecta directamente á calidade de vida das persoas– e, no seu lugar, céntranse en satisfacer algúns intereses políticos e persoais de cara aos procesos electorales externos ou internos.



Grupo Provincial Socialista

Rúa Progreso, 32 – 2º andar
32003 Ourense
Tlf. 988 385 203 Tlf/Fax. 988 385 178
CIF: G32244345

Ademais, provocan unha desequilibrada redistribución dos recursos, marxinando a uns municipios e veciños e veciñas fronte a outros. Polo tanto, asistimos a consolidación dunha veciñanza de primeira categoría, fronte a outra de segunda ou terceira categoría.

Este sistema caciquil articulado unilateralmente polo PP e pola presidencia provincial ao longo das últimas décadas, provocou que os nosos veciños e veciñas teñan pouca confianza no noso sistema político local e na capacidade desta deputación para actuar en beneficio de toda a comunidade. O descontento e a destrución da confianza e da imaxe da institución é evidente, dentro e fóra dos nosos límites provinciais.

Desde o PSdeG-PSOE de Ourense pedimos recorrentemente a aprobación dun plan único que, do mesmo xeito que no resto de institucións análogas, distribúa democraticamente os fondos públicos entre todos os concellos. E unha vez máis, ante a ameaza da inminente aprobación dunha nova *tropolía* orzamentaria, vémonos na obriga de reclamar un **reparto xusto, equitativo e operativo dos cartos que van ser redistribuídos directamente mediante modificacións orzamentarias**, así como a **aprobación dun plan único que permita financiar proxectos, actuacións, actividades, plans ou programas** remitidos por todos os municipios.

Ese plan permitiría identificar as necesidades de cada municipio en base a uns criterios democráticos e asignar o orzamento de maneira adecuada. Desta forma, asegurárase que todos e todas teñan acceso a recursos para satisfacer as súas necesidades locais, mellorando a calidade de vida e os servizos prestados. Tamén permitiría establecer unha estratexia integral e coherente para o desenvolvemento da provincia, cos obxectivos de aproveitar ao máximo os nosos recursos económicos e de maximizar os resultados.

Este cambio de modelo –pasar do caciquismo total á democracia plena– tamén é relevante, porque permitiría establecer mecanismos reais de seguimento e avaliación dos proxectos financiados, o que posibilitaría practicar unha verificación efectiva de que estes fondos provinciais están a utilizarse adecuadamente, acadando os resultados esperados.

Así mesmo, grazas a esta visión integral das necesidades de cada municipio detallada por cada un deles, a deputación podería establecer unha estratexia provincial sólida e efectiva para o presente e o futuro. Tamén permitiría promover a colaboración institucional, xa que, cun orzamento distribuído de maneira xusta, os municipios poderían traballar en proxectos comúns e compartir recursos. Ademais, sería unha mostra de compromiso real do goberno provincial coa transparencia e coa rendición de contas.

O marco xurídico ten situadas ás deputacións como entidades supramunicipais ás que, ademais de recoñecerlles un ámbito de intereses propios, atribúelles garantir os principios de solidariedade e equilibrio intermunicipal.

Os e as socialistas ourensáns defendemos que os obxectivos nucleares deste tipo de transferencias directas ás entidades locais, deben ser sanear e impulsar as economías municipais; favorecer a creación e mantemento do emprego e das economías a escala local



Grupo Provincial Socialista

Rúa Progreso, 32 – 2º andar
32003 Ourense
Tlf. 988 385 203 Tlf/Fax. 988 385 178
CIF: G32244345

e reforzar a autonomía municipal, respectando, en todo caso, os principios recollidos na lexislación. No caso concreto de Ourense, os fondos da deputación deberían ser ese revulsivo que precisan as economías e as sociedades dos 91 concellos de menos de 20.000 habitantes e da entidade local menor de Berán e non só para unha parte deles, decididos baixo unha regra universal: o dedo dunha persoa.

A Lei 7/1985, reguladora das bases do réxime local, establece que é competencia propia das deputacións a asistencia e a cooperación xurídica, económica e técnica aos concellos, especialmente ós de menor capacidade económica e de xestión, en base a principios que permitan a equidade das súas políticas. Sen embargo, na provincia de Ourense isto non sucede porque o principio único é a discrecionalidade.

Estes feitos contrastan enormemente co esforzo que están a facer nas demais deputacións neste ámbito, agrupando todas as subvencións nun plan que, ademais de simplificar a burocracia e axilizar as achegas, permite repartir ou diñeiro público de xeito obxectivo en función de criterios ponderados.

En conclusión: a recorrente aprobación de subvencións nominativas masivas na Deputación de Ourense, baseada unicamente en motivos políticos, co único fin de repartir decenas de millóns caciquilmente, provoca desigualdades e socava a confianza da poboación no noso sistema político e na nosa institución, incumprindo así o código ético e quebrantando os principios básicos que rexen o uso democrático dos fondos públicos.

Por tanto, é fundamental garantir unha distribución dos fondos públicos en base a criterios como a superficie, a poboación, a dispersión, o número de entidades de poboación ou o índice de envellecemento, para asegurar unha xestión eficiente e responsable.

Debemos levar a cabo unha racionalización e simplificación dos variados instrumentos e sistemas de reparto actuais e, por iso, queremos que o goberno provincial e todos os grupos desta corporación conformen un grupo de traballo que posibilite unha distribución orzamentaria xusta, equitativa, transparente e plenamente democrática para os municipios da provincia de menos de 20.000 habitantes.

É imprescindible pois, ofrecer unha resposta eficiente ás situacións e necesidades concretas presentadas por cada concello da provincia, reforzando a súa autonomía local.

Por todo o exposto, o grupo socialista presenta a seguinte **PROPOSTA DE ACORDO**:

1. Instar á Deputación Provincial de Ourense á constitución dun grupo de traballo, formado por unha representación proporcional de todos os grupos políticos presentes na corporación, co fin de aprobar un instrumento de cooperación cos 91 municipios da provincia de menos de 20.000 habitantes, que permita executar un reparto xusto, operativo, equitativo e democrático



Grupo Provincial Socialista

Rúa Progreso, 32 – 2º andar

32003 Ourense

Tlf. 988 385 203 Tlf/Fax. 988 385 178

CIF: G32244345

dos fondos públicos da institución, no que a elección da actividade subvencionable corresponda ás entidades locais.

2. Instar á Deputación Provincial de Ourense á aprobación dun instrumento de cooperación –plan único– que garanta que os 91 municipios da provincia de menos de 20.000 habitantes teñan un acceso xusto, operativo, equitativo e democrático aos recursos necesarios para obras, subministros, adquisición de bens inmoables e propiedade inmaterial, así como para actividades e servizos que sexan de competencia municipal, co fin de mellorar as súas prestacións e para impulsar o seu desenvolvemento económico e social.
3. Instar á Deputación Provincial de Ourense a financiar ou, a lo menos, cofinanciar os proxectos presentados polos municipios que foron rexeitados polo goberno provincial nos últimos anos, en base ao seu deber legal recollido na Lei 7/1985, reguladora das bases do réxime local, que establece que é competencia propia das deputacións provinciais a asistencia e a cooperación xurídica, económica e técnica ós concellos, especialmente aos de menor capacidade económica e de xestión, en base a principios que permitan a equidade das súas políticas e os seus investimentos.

En Ourense, 10 de febreiro de 2023.

Asinado: Rafael Rodríguez Villarino.

SR. PRESIDENTE DA DEPUTACIÓN PROVINCIAL DE OURENSE